

## Bosanski

Svi ljudi se rođaju bezgriješni.  
Svi ljudi su jednaki pred Bogom.

Svi ljudi su nevini dok se ne dokaže da je neko kriv.  
Svi ljudi su dobri dok se ne pokaže da je neko loš.  
Svi ljudi su pravedni dok se ne utvrdi da je neko nepravedan.

Svi ljudi u Srebrenici bili su živi dok ih nisu ubili.  
Svi su krivi dok se ne uhvate oni koji su zločin počinili.

Zlo je prisutno, ali nije asolutno.  
Dobro je apsolutno, ali ponekad je potisnuto.

Prije deset godina ovdje u Potočarima dobro je potisnuto. U trenutku zlo se ovdje dovuklo da svjedoči o svijetu u kojem živimo. Danas, pred ovim ljudima koji su ubijeni 11. jula 1995. god. samo zato što su bili muslimani, savjest svijeta mora da se probudi.

Jer, svijet ne može preživjeti zlo i zločin protiv čovječanstva. Svijet može živjeti samo u dobru.

Svijet u kojem danas živimo nije najbolji mogući svijet. Svijet u kojem će naša djeca živjeti može biti najbolji mogući svijet ako svi ustanemo protiv holokosta, genocida i terora koji se širi svijetom.

Srebrenica je mjesto i 11. juli je vrijeme kad treba da položimo zavjet pred Bogom i svijetom da ćemo se boriti protiv zla čovjeka koji je ubio nevino dijete samo zato što je bilo drugačije vjere.

Mi smo ovdje da se zna,  
Da je istina naša snaga,  
Da je pravda naša sudbina,  
Da je ljubav naša nada,  
Da je mir naša poruka,  
Da je Bosna naša domovina,  
Da je Srebrenica zvijezda,  
Koja budi savjest,  
Onih koji dadoše mač,  
Nasilniku da ubije,  
Nevina čovjeka.  
Zato, molimo Allaha Milostivog  
Da majkama Srebrenice podari sabur,  
A prijateljima našim volju i snagu  
Da nasilnicima oduzmu mač,  
Jer plač nevinog djeteta,  
Je grijeh kojeg ne može podnijet  
Plemenita savjest čovječanstva.

Bože Milostivi,  
Ako mi zaboravimo Tebe,  
Nemoj Ti zaboraviti nas.

Ako pogriješimo,  
Podari nam snagu Ademovog (a.s.) pokajanja.

Ako nas zamrači krivovjerje,  
Osvjetli nam put Ibrahimovim (a.s.) pravovjerjem.

Ako nas zadesi nesreća,  
Pouči nas Nuhovoj (a.s.) lađi spasa.

Ako nas uhvati strah od silnika,  
Osposobi nas Musaovom (a.s.) hrabroćću.

Ako nam se ponudi mržnja,

Spasi nas Isaovom (a.s.) ljubavlju.

Ako budemo protjerani iz domova naših,  
Osnaži nas Muhamedovom (a.s.) željom za povratkom.

Bože Svemogući,  
Ujedini naša srca u vjeri i ljubavi,  
Učvrsti korake naše u istini i pravdi,  
Osnaži volju našu u bratsvu i slozi,  
Udruži misli naše u domu i domovini.

**Molimo Te, Bože,**  
**Da tuga bude nada,**  
**Da osveta bude pravda,**  
**Da majčina suza bude molitva,**  
**Da se više nikada i nikome ne ponovi Srebrenica. Amin!**